

Stichting Anne Frank Stichting a presenta

Dos proyecto interesante na Prome Minister Eman

ORANJESTAD- Diahuebs cu a pasa Prome Minister Mike Eman a haya bishita di sra.mr. Joyce Overdijk-Frances y sra.Josephine de Man, representantenan di “Anne Frank Stichting”.

E bishita aki ta den cuadro di e deliberacionnan cu ta tumando lugar pa realisa dos proyecto e aña aki ainda.

E prome proyecto ta “Estatua Anne Frank” y e otro ta “Les y Skirbi cu Anne Frank”.

Proyecto “Estatua Anne Frank”

Fundacion Respeta Bida, Semper Corda, ta encarga cu e preparacionnan pa laga traha un estatua di Anne Frank y pone esaki den e parke dilanti Juliana MAVO-school. E proyecto aki ta planea pa wordo ehecuto dia 12 di juni, e fecha natalicio di Anne Frank. E intencion ta pa devela e estatua na su honor.

E fundacion a wordo representa pa sra.Diana Pieters-Gonzalez, sra.Martha Lichtenstein y sr.drs.Jose Fernandes Perna. Proyecto “Les y Skirbi cu Anne Frank”

E proyecto aki ta na encargo di Biblioteca Nacional Aruba (BNA) hunto cu Instituto Pedagogico Arubano (IPA). Fundacion Respeta Bida, Semper Corda tambe ta

sostene e proyecto aki, cu si tur cos cana bon lo wordo realisa na luna di September y October.

Stichting Anne Frank di Hulanda lo facilita e proyecto “Les y Skirbi cu Anne Frank” cu material pa alumnonan di scol, cu training pa maestronan di scol y tambe cu un exposicion encuanto Anne Frank. Directora di BNA sra. Astrid Britten y directora di IPA sra.drs.Ava Thode hunto cu e coordinadornan di e proyecto, sr.drs.Mirto Lacle y sra.Jennifer Lacle-Boezem tambe a forma parti di e delegacion.

Prome Minister Mike Eman a expresa su apoyo pa e desaroyo y e metanan di ambos proyecto. Fundacion Respeta Bida, Semper Corda ta pone accento riba e importancia cu momentonan di reflexion asina ta duna pa fortifica e sentido di tolerancia, solidaridad y amor prohimo den nos comunidad. “E combinacion di un programa educacional na scolnan cu un mobilisacion comunitario pa enfoca riba e balornan intrinseco di e ser humano ta wordo considera un responsabilidad cu nos tur tin cu carga, apoya y inspira cu tur nos talentonan, conocimiento y energia”, asina Prome Minister a enfatisa.

